



ՆԱՐԵԿ ՎՐԴ. ԾԱՔԱՌՅԱՆ

(Վանահայր և Գեղարդա վանքի)

ԽՈՐՀՐԴԱԾՈՒԹՅՈՒՆՆԵՐ ՄԵԾ ՊԱՀՔԻ ԾՐՋԱՆԻՆ

Մեծ պահք է:

Եկեղեցին ապաշխարության օրերի մեջն է:

Մեծ պահքը այն շրջանն է, երբ հավատացյալն ամբողջապես հետամտությունն ունի իր հոգևոր, ներհայեցողական ճշմարիտ կյանքի: «Պահքը իր ծովի և կամ անյուղ ու անծուր ուտելիքի, և նույնիսկ իր լոկ աղոթհացի իմաստով, կերակուրի արտաքին խնդիր մը չէ: Այս մասին շատ որոշ և շատ բացարձակ է Ավետարանի սկզբունքը. «Իւրաքանչիւր ոք զիւր միտս հաճեացէ» (Հռոմ. ԺԴ 5), (Բարգեն կաթողիկոս, «Դասեր Ավետարանեն», էջ 15):

Պահքի կամ պահեցողության սկզբունքը շատ հին է: Հին Ուխտում Մովսես մարգարեն պահեցողությամբ 40 օր շարունակ պատրաստվեց իր գործունեությանը: Սակայն, ըստ ս. Ներսես Ծնորհալու, պահքի օրենքը հաստատվել է Աստուծո կողմից, արարչագործության ժամանակ, առաջին մարդու՝ Ադամի ստեղծումից անմիջապես հետո. «Որ զօրէնս սրբութեան պահոց՝ նախ ի դրավստին աւանդեցեր» (շարական): Նա-

խահայրերը՝ Ադամն ու Եվան, «ոչ պահելով նախաստեղծիցն ճաշակմամբ պտղոյն ճաշակեցին զդառնութիւն մեղաց և մահու»:

Թե՛ Հիսուս Քրիստոս և թե՛ Հովհաննէս Մկրտիչ ևս, իրենց մեծ առաքելություններից առաջ միշտ պահեցողության մի կարելի շրջան են ունեցել և նոր միայն զորացած հոգով գալիքը հաղթահարել:

Պահքի օրենքը կամ կանոնը պաշտոնապես հաստատել են առաքյալները ժողովներում: «Կանոնք առաքելականք»-ի Ը գլխում կարդում ենք. «Կարգեցին առաքելաքնն և եղին հաստատութեամբ, թէ զԽ (քառասուն) ար պահս կարգեցեն յամենայն չարութենէ, ի մեղաց և ի կերակրոյ, շառացքան զարն չարչարանաց Փրկչին մերոյ. և ապա... տան յարութեան Փրկչին»: Պարզ է, խոսքը Մեծ պահքի մասին է, քառասուն օր նախքան ս. Զատիկը:

Կրոնաբարոյական գեղեցիկ բացատրություն է տալիս նաև պահքի կարևորության և նրա նշանակության մասին ս. Գրիգոր Լուսավորիչն իր «Յանախապատում ճառք»-ի Թ գլխում. պահքը, ասված է այն-

տեղ, «դաստիարակ են մարդկան, խափանիչ անժուժկայութեան ամենայն վնասուց... կատարեալ հաստոյ ճշմարտութեան ազդեցութիւն. յոյսն ստողութեան, ստի՞ջ սրբութեան: Պահքք աղ են, որ անուշացնեն զնեխութիւն հոգոյ և մարմնոյ, աշտեղութիւն մեղաց»: Ուրեմն պահքը այն շրջանն է, երբ այս քառասուն օրերին ճշմարիտ քրիստոնյան հետևելու է իր անձին, անվանը և կոչումին, կարողանալու համար ատովածահաճո, մեղքից հեռու, անսպասք կյանքով ապրելու՝ հասնելու դեպի կատարելության և Աստված իր ձգտումի ճանապարհին: Դարձաւ, պահքը այն շրջանն է, երբ կյանքիդ այսօրվա հայելու մեջ վճիտ կերպով պիտի պարզ դառնա վաղվա կյանքիդ պատկերը՝ բոլոր տեսակի փորձություններին ու գայթակղություններին հաղթելու, խոնարհության, հավատքի, լավատեսության, անձիդ վրա հսկելու ճանապարհով:

Ս. եկեղեցին և եռամեծ հայրապետները հաստատելով շաբաթապահքը կամ մանավանդ քառասնորդական այս պահքը, նպատակ են ունեցել իրենց կրոնաբարոյական թելադրություններով հետամուտ լինելու և ճանաչել տալու հավատացյալներին մեղքի ու չարի, գեղեցիկի ու տգեղի, օրինականի ու ոչ օրինականի հարցերը՝ լուսավոր, օգտակար և աստվածահաճո կյանքին ի խընդիր: Ահա թե ինչու այս իմաստով շատ դաստիարակչական են, շինիչ՝ հոգևոր իմաստով, ապաշխարության այս օրերի ամենօրյա շարականները՝ գրված ու Մետրոպ Մաշտոցի և կիրակի օրերի ավագ օրհնությունները՝ ու Ներսես Շնորհալի հայրապետի կողմից: Դրանցում, ապաշխարության ամենօրյա շարականներում, ահա օրինակ, ներկայացվում են մեղքի մեջ ընկողնված և տվալտող մարդու հոգու ալեկոծումները.

«Ծով կենցաղոյս հանապազ գիս ալեկոծե,
Մրրկեալ ալիք թշնամին ինձ յարուցանե,
Նստապետ՝ բարի, լեր անձին իմոյ ապաւեւն»:

Իր մեղավորությունը գիտակցող մարդը, սակայն, զգում է, որ ինքը «ճշմարտութեան գիտութիւնը» կորցրել է ու հիմա այսպես հարվածված այդ մեղքից դարձել է հիվանդ ու մոլորված. այժմ մնում է միայն այն, որ նա զղջա իր սխալը «բազումողորմ Փրկչի» մոտ և Նրան խնդրի, որ ներվեն իր մեղքերը. «Վտանգիմ ի բազմութենէ մեղաց իմոց»: Ահա այս է մեղավորի գիտակից խոսքը, որին և հաջորդում է իսկույն խոստովանությունը:

«Ձղջման իմոյ զարտասուս արկանեմ

սուաջի քո Բրիստուս.

Թող ինձ զմեղս իմ և ողորմեա»: Ահա այսպես է, որ ապաշխարողի հոգին արթնում է մեղքից. նա ոտքի է կանգնում իր մեղքի բեռան ծանրությունից թեթևացած:

Ապաշխարության խորհրդի ընթացման հարցում մեծ կարևորություն ունեն մանավանդ Մեծ պահքի վեց կիրակիները՝ իրենց համապատասխան շարականներով և սուրբ գրական ընթերցումներով: Այդ կիրակիները կոչվում են «Բուն բարեկենդակի», «Արտաքսման», «Անատակի», «Տնտեսի», «Դատավորի» և «Գալատյան»:

Մեծ պահքի առաջին՝ «Բուն բարեկենդակի» կիրակին նվիրված է արարչագործության հիշատակին: Ծիշտ է, որ շաբաթ երեկոյան վարագուրով փակվում են եկեղեցու ս. խորանները, սակայն ապաշխարության օրերի մեջ մտնող մարդու համար դեռ ուրախության և տոնական մի օր է: Այդ օրվա շարականից մի անգամ ևս պարզ է դառնում այն, որ արարչագործությունը կատարված է Աստուծո կողմից վեց օրում և որպես նրա թագն ու պատկն էլ, վերջին օրում, ստեղծված է Արարչի՝ Աստուծո սիրելին՝ առաջին մարդը՝ Ադամը: Արարչագործության նախորդ հինգ օրերում բանակաւնության օժտված ստեղծագործություններ չկան: Միայն մարդուն է շնորհված, Աստուծո ընկերակցության համար, բանակաւնություն, ազնու կամք և անձնիշխանություն: Մարդը «հող յերկրէ» է, սակայն նա միայն նույն կամ ֆիզիկական գո չէ, այլ ունի նաև շունչ կենդանի՝ հոգի, և ապրում է նյութի ու հոգու սահմանների հաղորդակցման կամ շփման կենտրոնում: Սակայն Աստուծո պատկերով ստեղծված մարդը շատ հաճախ չի կարողանում պահել իր բարձրագույն կոչումն ու պատիվը, դառնում է օրինազանց, կորցնում իր «սկզբնական արդարութիւնը», մեղանչում է: Մեղքին հաջորդում է պատիժը: Նա արտաքսվում է դրախտից, եղծում «աստվածային» պատկերը: Իրոք, «Մարդ ի պատուի էր և ոչ իմացաւ. հաասարեաց անբանից և նմանեաց նոցա»:

Հուրախություն և ի մխիթարություն մարդուն, դրախտից վտարված մարդը, սակայն, Աստուծո չի մոռացվում: Այստեղ էլ նա իր կամքն ու անձնիշխանությունը պահած լինելով եթե ցանկանա, Աստված կհասնի նրան, կփրկի, որով և կերաշխավորի հավիտենականի հույսն ու Աստուծո հետ ունենալիք գործակցությունը: Սակայն այս բանի համար, իհարկե, պետք է ունենալ կամք, հավատք և հույս: Բրիստոսի մարդեղության հիմնական նպատակը մարդու փրկությունն է և նրա վերադարձը դրախտ:

տալին անմեղության և արդարության: Անառակ, բայց որդի: Աստված «ոչ կամի զմահ մեղաորի, այլ զդատնալն նորա և զկեալն»:

Մեծ պահքի երկրորդ և երրորդ կիրակիներն իրենց շարականներով, ս. ավետարանական ընթերցումներով և այլարանական պատումներով շատ ուսանելի են և համոզիչ: Մարդը վտարված է դրախտից, որովհետև բացահայտված է անհնազանդությունը, օրինազանցությունը և սխալ կերպով գործադրված կամքի ազատությունը: Սակայն, ըստ աստվածադիր մի այլ օրենքի, եթե օրինազանցության համար տրվում է համապատասխան պատիժը, ապա ուրեմն մեղքի և անառակ կյանքի համար զրդշումի դեպքում էլ՝ կտրվի փրկությունը: Բավական է, որ Անառակը, այսինքն մեղավոր մարդկությունը, որի ավետարանական գեղեցիկ պատմությունը բոլորին հայտնի է, գիտակցի իր մեղքը և զղջա, ընդունի իր պատասխանատվությունը իր անկման մեջ և վճարկան որոշումով զարթնի նրա խավարած հոգին: «Հայր, մեղա լեղկինս և առաջիք», ինչպես առակումն ընտանիքի հայրն է, Աստված կների նրան:

Ահա այս անկյունադարձային տեղում է, որ մարդն իր ազատ կամքով պետք է դըրսեվորի իրեն որպես մարդ՝ իր կատարելության ձգտումով, թե՛ մարդ՝ իր մեղանշականությամբ ու էլ ավելի կործանումով, որպես մարդ և Աստուծո պատկեր մեղքից հեռու, թե՛ որպես մարդ չարի և մահվան գերի՝ իր կործանումով: Այո, «դուք եք տաճար Աստուծոյ կենդանոյ» Հիսուսի կարևոր խոսքերը չպետք է մոռանալ, եթե ոչ «մեղքի վարձքը մահն է» կվճռի նա և մարդու կորուստը կդառնա անխուսափելի: Ուրեմն թույլ չպետք է տալ, որ մեղավորը իր իսկ ձեռքով իր կորուստը պատրաստի: Եթե նա, առաջին մարդը, դրախտում, որ Աստուծո տնտեսությունն է, չկարողացավ որպես մի տնտես իրեն լավ դրսևորել, գոնե այստեղ՝ երկրի վրա և մարդկային հարաբերություններում պետք է իմաստուն լինի, որով և պատրաստ՝ մաքուր հաշիվ տալու իր բոլոր գործերի համար: Եվ ահա Մեծ պահքի չորրորդ կիրակին էլ այդ դասն է հուշում:

«Անիրավ տնտեսի» առակով, Ավետարանում և օրվա շարականից պարզ է դառնում, «որ տիրապես մեծատունդ՝ ստեղծեր երկրորդ աշխարհ զգալի. և ի դրախտն լաղենի՝ տնտես եղեալ զմարդն առաջին» (շարական): Այստեղ մարդը, որպես Աստուծո պաշտոնյա, հաշվետու և պատասխանատու անձ է «մեծատան» կամ այս կալվածքի Տիրոջ՝ Աստուծո առջև, բացատրում

է իր շարականով Ներսես Ընդհարակին: Ու եթե պատահի, որ մի օր «Մեծատունը» ապի. «Տո՛ւր զհամար տնտեսութեան քո», ինչպես այդ հաշիվը պահանջել էր դրախտում («Աղամ, ո՛ր ես»), այդ տնտեսը անկատարաց պետք է կարողանա պահանջվող հաշիվները տալ, որով և արժանանալու «Տիրոջ» գովասանքին: Այլապես «զի՞նչ օգուտ է մարդոյ, եթե աշխարհս ամենայն շահեացի և զանձն իւր տուժեացի»: Նյութը նարդուն չպետք է իր գերին դարձնի և նրան տանի դեպի օրինազանցություն ու մեղանշում: Այո՛, կամք և անձնիշխանություն իրենց իրավունքի մեջն են, բայց չէ՞ որ օրենքն ու արդարությունն էլ կպահանջեն, որ մեղավորը պատժվի:

Մեծ պահքի հինգերորդ կիրակին աղոթքի խորհրդին է նվիրված: Աղոթքի կարեվորության մասին ևս այդպես լուրջ և իմաստուն կերպով խոսում է ս. Ներսես Ընդհարակին իր օրվա շարականում:

Աղոթքը ապաշխարող հոգու ցնծությունն է, ճշմարիտ արտահայտությունը, որով հոգին դառնում է ավելի գեղեցիկ, ազնիվ ու լուսավոր: Աղոթքը այն ուժն է, որը բեզմղում է ճշմարիտ գրույցի Աստուծո քեզ: Այն մի կամուրջ է նետված այստեղից երկինք, որով մեր խնդրանքները հասնում են առ Աստված և միաժամանակ վերադառնում և բերում են Աստուծո շնորհներն ու օրհնությունները: Աղոթքը աղոթք է, եթե այն մաքուր սրտից է բխում, եթե այն հարատև է ու հետևողական: Ս. Ներսես Ընդհարակու գրչին պատկանող այդ օրվա շարականում ասված է. «Ընդհարեա մեզ յամենայն ժամ լինել քեզ յանդիման մաքուր աղօթիք»: Օրվա ս. Ավետարանն էլ պահանջում է նույնը. «Պարտ է յամենայն ժամ կալ նոցա յաղօթս և մի ձանձրանալ»: Եվ շարականի պատումն էլ պտտվում է նույն Ավետարանի շուրջ՝ օրվա խորհրդի մեկնությամբ հանդերձ:

Տեղին է անդրադառնալ նաև այն բանին, որ աղոթքը մաքուր է, երբ այն կատարվում է ըստ Աստուծո կամքի, «եղիցին կամք քո», և ոչ թե մերը՝ տկար ու եսական, վրեժխնդիր կամ կրքով, չար պահանջներով լեցուն: Աղոթքի մեջ կամքը պարտադրել՝ պիտի նշանակեր Աստուծո առաջ պայմաններ դնել և չվստահել Նրա հավասարաբաշխ սիրուն և անաչառությանը:

Ապաշխարության այս օրերով ձեռք բերված երջանկությունից ու մխիթարությունից ավելի լավ բան դժվար թե լինի ապաշխարող հոգու և կատարելության ձգտող մարդու համար: Այդպիսի քրիստոնյա մարդու համար ապաշխարությամբ եղած հոգու սըր-

բացումն ու մաքրությունը իր կարևորությունն է ստանում այն պայմանով, որ իրոք խաչվող և հարություն առնող Քրիստոսի կյանքի խորհրդով ավելի է վավերացվում այն, թե իրոք Դրանով՝

«Տրվում է՝ մեր մեղքերին դարձ,
Պարտքերին՝ շնորհում, եղծումներին՝ ևնորություն,
Քավություն անօրենության, բուծումն վերքերի,
Անդորրություն տագնապի, ներումն պատժի,
Հանդարտումն պատերազմի, անձրև՝ կրակի վրա,
Պատուհասի փոխարեն՝ պարգև,
Եվ սատակման տեղակ՝ շնորհի արժանացում
Եվ կյանքի ազատություն՝ մահվան գործիքի փոխարեն»:
(Նարեկացի, ԼԳ)

Եվ ահա այս երջանկությամբ մարդը սիրով և համբերությամբ դիմավորում է Մեծ պահքի վեցերորդ կիրակին, որը, ինչպես գիտենք, նվիրված է Փրկչի գալստյանը:

Ապաշխարողը հինգ կիրակիներն իր ետեվում թողած, եթե օրհնազանց էր ու արտաքաված, անառակ էր ու հոռետես, իր սխալը զգացած ու դարձի եկած, հարատև աղոթքով և պատվիրանապահությամբ հասած մինչև այսօրը սպասումի մեջն է, թե Քրիստոսի գալուստը, որը լինելու է անպայման, իր համար էլ է՝ Եվ եթե Նա գա, ինքն էլ անշուշտ կարժանանա զնալու այնտեղ, ուր է Աստուծո թագավորությունը: Քրիստոսի, որպես երկրորդ Ադամի, առանց

այս գալստյան՝ փրկագործության խորհուրդի ամեն ինչ կմնար կիսատ, և մարդու կյանքը կդառնար անիմաստ: Բայց լավ է, որ այդ հույսի մասին «բազմապատիկ օրհնակօք» հառաչագույն գուշակված էր, և մարդը սիրով սպասում էր այդ խորհուրդին, գրում է այդ մասին մի այլ շարականում Ներսես Ծնորհալին. «Քո անպատում խնայողությամբդ և կամատր խաչելությամբ՝ հաշտեաց ընդ մեզ, Տէ՛ր, գթությամբ և թող զմեղս ողորմությամբ»:

Մեղավոր մարդը հուսացող մարդ է, որ հավատում է, թե ապաշխարությամբ և խորհրդածություններով կդիմավորի Փրկչի գալուստը, քանի որ նա հաստատ համոզված է Քրիստոսով պայմանավորված իր փրկությանը և իր հոգու հավասարակշռությանը, որոնցով և կարժանանա Աստուծո երանավետ տեսությանը:

Եվ միշտ էլ, քանի ուշ չէ, թող ուրեմն սպասենք «ցառագին հեծությամբ և պահօք պնդությամբ, բազում զղջմամբ և ապաշարք զսխալանսն սգալ հանապագ, որ վրիպեցան յերանելի յուսոյն և ի յայտնության փառաց մեծին Աստուծոյ» (Յանախայ., ԺԲ) դիմավորելու համար թե՛ Քրիստոսի ս. գալուստը, թե՛ նրան հաջորդելիք ս. Հարության առավոտը:

Աստուծո կամքը արդար է և Նրա բարի աչքը մեր վրա: Մենք Իր արարածները թող վերանորոգված կյանքով ու մեր արի ու բարի հավատքով ու գործերով աղոթենք անելով. ով Տե՛ր, «յուսալով յողորմութիւն քո... բաց մեզ զդուռն ողորմութեան քո, և սրբես զմեզ ի գաղտնեաց մեղաց մերոց» (Հ. Ոսկերեարան):

